

# DOMENIE VI DI PASCHE

## Jutoris pe Liturgjie

Domenie, ai 6 di Mai dal 2018 - aniversari dal taramot dal 1976

*Vuê te prime leture e ven proclamade une grande pagine dai Ats dai apuestui, pagine tant impuartante e tant preziose tai moments atuâi sedi pe glesie universâl di pape Francesc e sedi pe nestre glesie locâl: dutis dôs clamadis tal grant o tal nestri piçul a frontâ panoramis gnûfs cuntun spirt gnûf.*

*Come che ai timps di Pieri a Cesaree al è intervignût il Spirtu Sant in persone a decidi la gnove pastorâl, cussì o vin di invocâ ancje nô il Spirtu Sant che al vegni a davierzi i nestris vôi e i vôi des nestris comunitâts par lei i segnâi dai timps e disserni lis pastorâls di meti in pratiche.*

*Intant, il mes de seconde leture e la lezion dal Vanzeli nus tocjin propit il cûr. No nus reste che lassâ spazi a chel mestri interiôr che al è il Spirtu Sant. Di fat, cuant che al vignarà lui, il Spirt di veretât, us menarà a la veretât dute interie (Zn 16, 13).*

*E comencin la messe cu lis peraulis de antifone di jentrade:*

### Antifone di jentrade

cf. Is 48,20

**C**un vôs di gjonde contait e fasêtlu savê;  
fasêtlu rivâ fint ai ultins confins de tiere:  
il Signôr al à liberât il so popul, aleluia.  
**Si dîs** Glorie a Diu.

### Colete

Diu onipotent, danus di celebrâ cun cûr e passion  
chestis zornadis di gjonde in onôr di Crist resurît,  
par podê mostrâ in ogni moment de nestre vite  
ce ch'ò stin fasint memorie.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE

At 10,25-27.34-35.44-48

**Il don dal Spirtu Sant al ven jù ancje parsore dai paians.**

*Il fat complet tai particolârs lu cjatìn in Ats dai apuestui cjapitul 10; culì la conte e je sacrificade par motîfs liturgjics.*

*A Pieri i jere improibît par educazion vude di frut in sù e par motîfs di cussience jentrâ in cjase di un paian...però culì cul paian Corneli al jentrâ in cjase... Mi stoi propit sancirant... nol fâs preferencis... nol veve nancje finît... il Spirtu Sant al vignì... Si puedial mo dineâur l'aghe dal batisim... E al ordenà di batiâju. *Une robonone*: il Signôr nol fâs preferencis cun nissun e in ogni part di mont al à agrât chel che lu tem e al pratiche la justizie.*

*Il Spirtu Sant al à spalancât tun marilamp puartis blocadis cun clostris e luchets di secui. Al disarès S. Pauli: Nol esist plui ni Gjudeu ni Grêc, nol esist plui ni sotan ni libar, nol esist plui ni om ni femine: ducj vualtris o sês une persone sole in Crist Gjesù (Ga 3, 28).*

*O podaressin clamâle: une resurezion, un passaç, une Pasche de comunitât, une vierzidure gnove par un mont gnûf. A so riflessions di fonde ancje pes nestris comunitâts di vuê.*

**Dai Ats dai Apuestui**

Al capità che, tal moment che Pieri al jentrave [te cjase di Corneli], chest i lè incuintri e si butà in zenoglon denant di lui par adorâlu. Ma Pieri lu alçà sù e i disè: «Jeve sù po, che ancje jo o soi un om compagn di te». E cjarant cun lui al jentrà in cjase, là che si intivà intun biel trop di int e ur disè: «Mi stoi propit sancirant che il Signôr nol fâs preferencis cun nissun e che in ogni part di mont al à agrât chel che lu tem e al pratiche la justizie».

Pieri nol veve nancje finît di dî chestis robis, cuant che il Spirtu Sant al vignì parsore di ducj chei ch'a scoltavin la peraule. E i fedêi gjudeos, ch'a jerin vignûts cun Pieri, si davin di maravee che il don dal Spirtu Sant al fos vignût jù ancje parsore dai paians. Che di fat ju sintivin a fevelâ altris lenghis e a laudâ Diu. Alore Pieri al disè: «Si puedial mo dineâur l'aghe dal batisim a di chei ch'a an vût il Spirtu Sant compagn di nô?». E al ordenà di batiâju tal non di Gjesù Crist. Po dopo lu prearin di restâ cualchi di cun lôr.  
Peraule di Diu.

## SALM RESPONSORIÂL

dal Salm 97

*Il salm ripuartât (un struc dal salm 98) al è la glorifizazion de regalitât di Diu sui popui e sul mont e ben si adate come rispueste al event di Pieri e di Corneli. Ancje vuê e te glesie di vuê o podìn cjata dai segnâi li che o vin di cjantâ:*

**R. Il Signôr al à palesade ai popui la sô justizie.**

*Se cjantât: Il cjant dai salms responsoriâi, p. 132.*

O ben:

**R. Aleluia, aleluia, aleluia.**

Cjantait al Signôr une cjante gnove,  
parcè che al à fatis robonis.  
Lu à fat vinci la sô gjestre,  
il braç de sô santitât. **R.**

Il Signôr al à palesade la sô salvece,  
in face di ducj i popui al à pandude la sô justizie.  
Si è visât dal so boncûr,  
de sô fedeltât pe cjase di Israel. **R.**

Ducj i confins de tiere a an viodude  
la salvece dal nestri Diu.  
Che i cjanti al Signôr dute la tiere,  
berlait, scriulait cu lis cjantis plui legris. **R.**

## SECONDE LETURE

1 Zn 4,7-10

**Diu al è amôr.**

*Par une persone che si riten moderne, l'amôr al è un sintiment che al nas, al cres e al mûr, al à lis sôs stagjons. Te pratiche, a chel che i va ben i va ben e a chel che i va mâl i va mâl. Finît li.*

*Pal cristian l'amôr al ven di Diu e al è dut un altris discors.*

*Chest di vuê, al è un piçul tratât mistic sul amôr; comprensibil a ducj e li che no centrin ni studis ni diplomas di universitâts catolichis. Al è dome di cjapâ cheste peraule cuntun cûr sencplîç e net. Di fat: Furtunâts i monts di cûr, parcè che a viodaran Diu (Mt 5,8).*

**De prime letare di san Zuan apuestul**

Miei cjârs, volinsi ben un cul altri, parcè che l'amôr al ven di Diu: chel ch'al vûl ben al nas di Diu e al cognòs Diu. Chel che nol vûl ben nol à cognossût Diu, parcè che Diu al è amôr. In chest si è palesât l'amôr di Diu par nô: Diu al à mandât il so unic Fi tal mont par che nô o vessin la vite midiant di lui. In chest al sta l'amôr: no sin stâts nô a volêi ben a Diu, ma al è lui che nus à volût ben a nô e al à mandât so Fi tant che vitime par parâ jù i nestris pecjâts.

Peraule di Diu.

### CJANT AL VANZELI

Zn 14,23

#### **R. Aleluia, aleluia.**

Se un mi vûl ben, al metarà in pratiche la mê peraule,  
al dîs il Signôr,  
e gno Pari i volarà ben e li di lui o vignarin a stâ.

#### **R. Aleluia.**

### VANZELI

Zn 15,9-17

**Nissun nol à un afiet plui grant di chel che a l da vie la sô vite pai siei amîs.**

*Ogni discors fat cul cûr al cjape i trois dal cûr, de tenarece, dal afiet, de confidence palesade tal segret, lontans di ogni indiscrete curiositât. No stin a lâ a cirî culi un prin e un dopo, un antecedent e un consequent, ma dome lassînsi cjapâ de peraule dal Signôr, polsant dongje di lui e scoltantlu come il dissepul che Gjesù i voleve plui ben e che te ultime cene si sbassà un tic sul pet di Gjesù (Zn 13, 21-25).*

#### **Dal vanzeli seont Zuan**

In chê volte, Gjesù al disè ai siei dissepui: «Come che il Pari mi à volût ben a mi, cussì jo us ai volût ben a vualtris. Restait tal gno amôr. Se o metarês in pratiche i miei comandaments, o restarês tal gno amôr, come che jo o ai metûts in pratiche i comandaments di gno Pari e o resti tal so amôr. Us ai dit chest par che la vuestre gjonde e sedi dentri di vualtris e la vuestre gjonde e rivi al colm. Chest al è il gno comandament: che si voledis ben un cul altri, come che jo us ai volût ben a vualtris. Nissun nol à un afiet plui grant di chel che al da vie la sô vite pai siei amîs. Vualtris o sês miei amîs s'ò fasês ce che us comandi. No us clami plui servidôrs, parcè che il servidôr nol sa ce ch'al fâs il so paron. Us ai clamâts amîs, parcè che dut ce che o ai sintût di gno Pari us al ai fat cognossi. No sês stâts vualtris a sielzimi me ma o soi jo che us ai sielzûts vualtris e us ai metûts par ch'o ledis e o produsedis e il vuestri prodot al resti, par che dut ce che i domandarês al Pari tal gno non us al dedi. Al è chest il gno comandament: che si voledis ben un cul altri».

Peraule dal Signôr.

**Si dîs** O crôt.

#### **Su lis ufiertis**

Ch'a rivin fin li di te, Signôr,  
lis nestris preieris dutune cu lis ufiertis,  
in mût che, smondeâts midiant de tô grazie,  
o sedin plui disponûts ai misteris dal to grant bonvolê.  
Par Crist nestri Signôr.

#### **Antifone a la comunion**

Zn 14,15-16

Se mi volês ben, o metarês in pratiche i miei comandaments,  
al dîs il Signôr.

Jo o prearai il Pari e lui us darà un altri Confuartadôr,  
di mût ch'al sedi cun vualtris par simpri, aleluia.

#### **Daspò de comunion**

Diu onipotent e eterni,  
che cu la resurezion di Crist tu nus ricreis pe vite eterne,  
fâs cressi in nô i benefizis dal sacrament di Pasche  
e rinfuarce i nestris cûrs cun cheste mangjative di salvece.

Par Crist nestri Signôr.

\* \* \*

**Riflession di pre Antoni Beline: Volê ben a presit de vite**

O sin simpri tal grant discors, te lungje fevelade, tal testament dal Signôr: ce che al à dit e racomandât prin di murî e dut l'afiet che al à palesât par chei apuestui che, cun dute la lôr buine volontât, no vaessin podût puartâ un pês cussi cjalcjât come chel de muart dal lôr paron e mestri.

Gjesù al sa che il lôr cûr al è avilît; al sa benissin che ce che al dîs...

\* \* \*

**Cjants pal timp di Pasche**

- Contait la buine gnove, *n. 66*;
- Crist nus da la sô lûs, *n. 158*;
- Victimae paschali laudes, *n. 159*;
- I cristians a cjantin laude, *n. 160*;
- Aleluia... O filii et filiae, *n. 161*;
- Sta legre, sante Glesie, *n. 162*;
- Christ ist erstanden, *n. 163*;
- Crist al è in vite, *n. 164*;
- Cristo risusciti, *n. 165*;
- Grosser Gott, *n. 166*;
- Al Agnel sacrificât, *n. 167*;
- Hvala veçnemu Bogu, *n. 168*;
- Te lodiamo Trinità, *n. 169*;
- Laudate Dominum, *n. 170*;
- O sin resurîts a la vite, *n. 171*;
- Benedete la zornade, *n. 172*;
- Il nestri Redentôr, *n. 173*;
- Si cjanti al Pari laut in cîl, *n. 174*;
- Nei cieli un grido risuonò, *n. 175*;
- O Cristo, sol di Pasqua, *n. 176*.

**Salm 94** : Vignît, batìn lis mans al Signôr, *n. 256*;

“ **80** : Gjoldêt in Diu nestre fuarce, *n. 256*;

“ **92** : Il Signôr al regne, *n. 258*;

“ **97** : Cjantait al Signôr une cjante gnove, *n. 261*;

“ **113a** : Cuant che Israel dal Egjit al è jessût, *n. 265*;

“ **113b** : No a nô, Signôr, no a nô, ma al to non dai glorie, *n. 266*.

**Tal libri Hosanna**, si puedin cjatâ ancjemò altris cjants e salms adats al timp di Pasche.

\* \* \*

*Centenârs di miârs a son i coments ai vanzei, a la peraule dal Signôr intai secui;  
ducj a àn cirût di sclarî,  
ma nissun al è rivât a zontâ alc di gnûf  
a ce che il Signôr al à dit.*

Hermann Hesse

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms resposoriâi, Ed. Glesie Furlane, 2012.*
- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- \* *Par domandâ chescj libris scrivêt a [info@glesiefurlane.org](mailto:info@glesiefurlane.org)*